

السيد الكبير الأستاذ محمد الحفني

اصديق ديواني ص ٢

وسكر الكرم على ما قدمتموه

لبيع هذا اليوا - مع تحية

اصيد ٢٠٠٠ ع

في ٣/٣/٢٠٠٠

٢٧٧٢١٧

الهيئة العامة لقصور الثقافة

إقليم القناة وسيناء


فرع ثقافة بورسعيد

## إمتني يا موهج تغني

اشعار بالعامية المصرية



كامل عيد



مدير ثقافة بورسعيد

رجاء محمد شادوفة

مدير الشئون الثقافية

أبو المعاطي سليمان

مدير الثقافة العامة

محمد خضير

## أدياء بورسعيد ومعطيات القرن الجديد

... ما من شك في أن الأدب يعد تواصلًا بين الأجيال والأجيال  
جيلًا بعد جيل ، وها نحن نقدم لك عزيزي القارئ ، إبداعات أدياء  
بورسعيد بين يديك وهي تحمل رؤى بورسعيدية خالصة تجاوزت الساحة  
الإقليمية إلى آفاق قومية عربية .  
ونتضمن لهذه الحركة الأدبية في بورسعيد دوام الإزدهار والتواصل مع  
معطيات القرن الجديد إنطلاقاً من هويتنا الثقافية والحضارية ذات الجذور  
الأصيلة والعريقة .

وفي هذا الصدد ينبغي أن نتقدم بالشكر لكل من يساهم في دعم الحركة  
الأدبية بالنشر لترى أعمالنا الأدبية النور وتصير رصيداً إبداعياً للأجيال  
القادمة ، وسعدنا أن نهدي هذا الإنتاج للسيد اللواء الدكتور مصطفى  
كامل محافظ بورسعيد راعي الثقافة والفنون بالمحافظة .  
ونخص بالتحية الناقد السينمائي الكبير الأستاذ على أبو شادي رئيس  
الهيئة الذي يولي الحركة الأدبية اهتماماً خاصاً تمثل في مضاعفة ميزانية  
النشر إلى ثمانية إصدارات أدبية في العام لكل فرع ثقافي ، كما نخص  
بالتحية الفنان عبد الرحمن نور الدين رئيس إقليم القناة وسيناء الثقافي  
لدوره الإيجابي في إثراء الحركة الثقافية بالإقليم وتحية من القلب لأدياء  
بورسعيد الذين يساهمون في حركة التنوير الثقافي بإبداعاتهم المتميزة .  
والله ولي التوفيق ...

(جاء محمد شادوفه

مدير فرع ثقافة بورسعيد



## الشراع القديم

حاسب يا موج عليه  
مش قد شيل ولا حط  
أنا وشراعى القديم  
يكفيننا شبر ميه  
لا لينا فى القويط  
ولا طمعانيين فى الشط  
نصيبى فى كل طرحه  
يكنى وان كان بملحه  
وشباكى فى كل سرحه  
أرقىها للصباح  
وفى موسم السمان  
انصبها فوق البر  
ويا ربح يا رحلة عمر  
بوصيك ودا مش أمر  
وكل ما فى الأمر  
ما تعريش الجراح  
ولا تنبش فى اللى راح  
ولا تنشر ليا عيب  
خليك نسمة بشراعى  
لما لحد المغيب

يوليه ١٩٩٨

# سلام سلاح

من وحي جنازة الشهيد عبد المنعم رياض

وقف هديرك يا مكن

ويا وطن

سلام سلاح

صلى على روح البطل

اللى فى عز الضلعه راح

يحجى الأمل

وعمره وهبه لعمرها

\* \* \* \* \*

طول عمره عاشق للبلد

هى الحبيبة والولد

هى القسم

سبق وعظم للندا يوم القدا

وصار علم

عالى على صارى الهرم

ووسام على صدرك يا مصر

\* \* \* \* \*

بشرى يا مصر

ما تحزنش

ابنك ما مات

رياض فى موته يا أمّارج السكات

سامعه الهتاف

شايقة الى شايلاه الكتاف

ماكانش موت

ده كان زفاف

دمعى انهمر

مش ع الشهيد

او من ألم

دى دموع فرح

محبوسه من يونيو الحزين

الى اتقدر

واللى طرح

ليله على ضيك يا مصر

بشرى يا مصر

فجرك أهه

طالع شديد

زاحف بيتحدى الوعيد

والشعب خضّر من جديد

شعبك عتيد

جذوره من عمر الزمن

جبينه عالى فى السما رغم المحن

الشعب على الصعب امتحن

الشعب بركانه انصهر

مليون نفر كانوا نفر

صوتهم بيدوى فى السما  
نفديك يا مصر  
نفدى العروبة بالدم  
ح نعدى فوق جسر الخطر  
وح نبنى جسر بجسمنا  
لو جسر صلب ح ينكسر  
مفيش مضر  
الشعب عارف ما نوى  
ولا فيش دوا اللالك يا نصر

\* \* \* \* \*

بشرى يا مصر  
شعبك أهه  
كذب اللى قال يوم محنتك انه اختفى  
كذب اللى قال يوم محنتك نجمه انطفى  
أبدا يا مصر  
كام من علو يكبرياته وما ملك  
على تراب أرضك هالك  
المجد لك يا شعبنا لك للأبد

مارس ١٩٦٩



# الفارس المغمور

اهداء الى اطفال الحجارة

يا رأس مال الوطن  
يا فارسى المغوار  
ليلاى بستانظرك  
فى نشرة الأخبار  
تسطر الملحمة  
بدمك القوار  
ليلاى  
بستانظرك  
والمجد بيصورك  
قصاد وحوش البشر  
أنت سلاحك  
حجر  
هما سلاحهم  
نار  
حقيقى  
أنت البطل  
والفارس المغمور  
اللى خرج للنور  
واللى اتولد محزون  
حذف بإيده الحجر

كسر إزار الكون  
فتح كتاب قصته  
هذا اللى كان  
مركون  
على رفوف الأمم  
نفض غبار الزمن  
خرج  
عشان ما يكون

\* \* \* \* \*

صغيري يا شهيد  
فى صبح يوم العيد  
فى توبك الجديد  
حضنتك من بعيد  
وبست فيك  
العلم  
ووجهك اللى ابتسم

\* \* \* \* \*

ومثلك لا يموت  
ولا يعرف السكوت  
سكوتك كان هتاف  
محمول على الكتاف  
بيسمع الأكوان  
وبيرعب السجان

وببشر المساجين  
بمحاكمة الطغيان  
وبعودة الأوطان  
لشعبها المسروق  
يا حلم  
كان  
مخنوق

وخرجت بره الطوق  
وصعدت بينا لفوق  
لفوق .. لفوق .. لفوق  
ارتفعت الهامات  
من شاطئء المحيط  
لدجلة والفرات  
لمسنا بيك السما  
وصورتك الملهمة  
وسام على الأغلفة  
والنسمة بترفها  
فى مواكب الإرسال

\* \* \* \* \*

يا شعلة الأجيال  
يا آهة الموال  
بأعلى قمة جبل  
نحت لك تمثال  
بشئطة المدرسة

ومريلة مزينة  
بدمك السيل  
وصوابك .. الصغار  
رافعهم .. بالتحدي  
علامة إنتصار

في ١٩٨٩

## الحشف

ابتسامتك هين يا حلوة  
شمعدانك  
ليه يا روحى  
مش منور؟  
قلبي عندك  
يا مدينتى  
قلبي حاسس يا مدينتى  
باللى بتحاولى تداريه  
باللى مش عايزه تقولىه  
قلبي حاسس يا مدينتى  
بكل شىء  
قلبي تحت الميه  
شايف بس مش قادر يحوش  
الوحوش  
جايه أخطر م القروش  
الحشف عشش  
ونابه  
مص أكثر من منابه  
مص فى عيدان الحديد  
مص فى عروق الخشب  
قاطع طريق  
للى يركن

فى الطريق  
والفلايك فى القرق (١)  
لونها بهت  
انتهت  
والولاد البمبوطية  
بره سور المينا  
غابوا  
يا مدينتى  
قلبى عندك يا مدينتى

\* \* \* \* \*

أه يا حلوة  
قلبى عندك  
ياللى واخده ع السهر  
والسمر  
ياللى نورك  
كان  
منسيكى القمر  
ياللى قلبك  
قلب فله  
يا للى بحرك  
سر سحرك  
وانتى طاله  
(١) القزف جراج بحرى

بحر  
لكن  
طرحه غلّه

\* \* \* \* \*

قلبي حاسس  
يا مدينتي  
باللي مشتاقه تشوفيه  
باللي نفسك  
تسمعيه  
للقنار ساعه ما نوره  
يجري ويبوس الشراع  
ينحنى له  
ويبتسم له  
ويشاور له  
على الديار  
والنايات ؟  
يا سلام  
والله أصغر صوت سقينة  
عندك أحلى من النايات  
فين  
هدير الرفصات ؟  
فين زحام المينا  
هين الدوامات ؟  
كل شيء في المينا

غطاه السكوت  
والنوارس عشت  
جوه القزف  
وانحرمتى  
مؤقتا  
من جمال الأمسيات .. ومن حاجات  
بس مهما الغدر خانك  
برضة انتى  
زى ما انتى  
ما انحنيتى فى يوم لغاصب  
أو عشان اللقمة  
هنتى

\* \* \* \* \*

يا مدينتى  
يوم ما قالوا  
النجمة  
من يحرك تعدى  
يومها ثورتى  
يومها قولتيها بتحدى  
مستحيل  
نجمة الباطل  
تعدى  
يتردم بحر البحور  
يبقى بور



شيء يهون  
بش مش ممكن يكون  
مهما كان  
إن نجمتهم تعدى  
مهما ح يطول التعدى

~ \* \* \* \* ~

يا مدينتي  
بكره ها تعود ابتسامتك  
وابتسامتي  
بكره ح يعود السهر  
بكره ح يعود السمر  
بكره ياما السسمية  
راح تهنى  
راح تغنى  
غنوة النصر الكبير  
يا مدينتي

في ١٩٦٨

## تعمّة ولاكل التعم

الحق جاى رافع إديه  
ولا عاdash فيه  
تعب وسلم  
والغلط جه داس عليه  
وشكلو له محكمة  
والزور وقف  
يشهد عليه  
والقاضى قال  
- أحسن تقرر  
وتعترف  
- على إيه يا بيه ؟  
دا أنا فى حالى  
وملتزم  
واحلف لكو  
بعمرى ويكل القيم  
- بتقول قيم ؟  
أديك لوحدك قلتها  
أديك وقعت يا محترم  
- ودى تبقى تهمة  
فى شرعكو  
واللا خطيئة فى عصرنا

واللا انتكاسه .. للعلم ؟  
خبرنى يا قاضى الحكم  
- هس انكتم .. هس انكتم  
دى تهمة ولا كل التهم  
دى هى لب المسألة  
هى اللى زرعت  
فى الجزيرة  
الببله  
جتكوا البلا  
دا احنا ما صدقنا  
إن معبدكو  
انهدم  
والأمن عاد  
للسلطنة  
وعرفنا مفتاح السكك  
والسلطنة  
عايزين  
تهدوا اللى اتبنى  
عايزين تعيدوا العكنه  
عايزين تعيشوا  
لو حدكو ؟ ده بعدكو  
دى تبقى خيبة متلثة ..  
معناها إن الصبح  
قطع السلسله

وخذ براحه ..  
وانجلا  
دى مهزلة  
مصيبة كبرى  
وزلزلة  
اصحوا وفوقوا  
واعلموا  
وفهموا أو لم تفهموا  
الصح .. يبقى فى شرعنا  
يعنى عبط  
خيال ماته وتنبله  
وده امرنا  
وده مرنا  
سمود لبط سمود غلط  
.. مسموح لكو  
سمود  
كما يحالكو  
بس ..  
فى سركو

فى ١٩٩٠

## فرحة

بالحق يا فرعون  
إيه اللي كان فرعونك  
مين أهلك ع الناس  
فى الرزق  
والأنفاس ؟  
وطلعت بالأوتاد  
على كتاف البشر  
واللى انطحن .. وانداس  
من خوفه م الحراس  
فى السر بيعلنك  
وف نومه بيطلعك ؟  
إيه اللي طمعك ؟  
إيه اللي فرعونك ؟

\* \* \* \*

زمان  
ما كانت شىء  
وصبحت كل شىء  
كمثل الأخطبوط  
مهيمن ع الخطوط  
ومن عصى .. كضر ..  
وبسبور السفر  
رهينة بامضتاك

رهينة بصحبتك ))

وهذا فى النعم

وذاك فى الحضر

\* \* \* \* \*

خرجت من الشقوق

تخلص الحقوق

وكنا نصدقك

كنا تشبهك

بنهر جاى بالخير

بعد انحباس المطر

وزاح امامه الخطر

وقلنا فيك دواوين

عظيمة

لو تتحمل

ينخ بيها الجمل

\* \* \* \* \*

وانا الى ضهرى

انحنى

فوق سقالات البنا

ولسه عارى البدن

وما شكيت

الزمن

ولما تعب القدم

سندب ضهرى  
ارتاح  
على جدار الهرم  
جروا ورايا الخدم  
اللا الجدار يتعدى  
من ريحه الأجرأ ..  
وأنا اللى لسه .. ما زال  
إديه متشققة  
م المونه  
والطرقة ..  
وما ختش الأجره  
وكانت المصطبة  
حصيرة بتضمنا  
وبتلهم الشعرا  
وكان بيحلالى  
لأنك الغالى  
الى بيشبهنا  
واللى  
ح نرسى  
معاه  
من بعد ما تهنأ  
نفخنا فيك  
وعليت  
طلعت فوق

ونسيت  
ندهنا ..  
لم رديت  
وكننت صفر  
بقيت  
عشرة  
على  
عشرة  
وبقيت من الأمرا  
وبتستعار مننا  
لأننا فقرا

في ١٩٩٠



## مشرط الجراح

يا مشرط الجراح  
حاسب على الغالى  
دا هو اخويا  
وصاحبى  
وعزوتى وحبائى  
ومسندى ورسمالى  
ونسمتى البقيالى  
بعطرها الفواح  
لعمر عدى وراح

\*\*\*\*\*

يا مشرط الجراح  
أنا صحيح خواف  
لكين مهوش م القدر  
ولا من السياف  
أنا خوفى  
من غلطتك  
لو تبقى  
مقصودة  
واحتاف زمن  
مقلوب  
يستأصل المعدول

## ويثبت المايل

\*\*\*\*\*

يا كلمة منقوشة

يا زفة منقوشة

مشوارنا آخره .. لفين ؟

تعبت خطاويننا

اختلت الموازين

إتلعبطة لالوان

على بعضها

وتاهت

الرؤيا في عتينا

بقينا متشابهين

بقينا مش عارفين

مين اللي من صفنا

ومين غدر بينا

\*\*\*\*\*

يا شجرة البلاب

يا مزوقة دارى

وفيكى متدارى

يا عاشقة

ومشبكة

فى حضن بيت جارى

بإيدى ح استأصلك

وانتى بتعطلىنى  
لكن على عيني  
خايف لتيجى فى يوم  
تبوحى وتفضفضى  
بكل اسرارى  
واحنا ف زمن  
مقلوب  
يستأصل العدول  
ويثبت المايل

فى ١٩٨٨

## رحلة ألم

بيتنا اللى عشش فيه  
يا ناس  
العنكبوت  
بيتنا اللى  
ماتعودش  
ابدا  
ع السكوت  
لوحده يات  
فى الضلمه  
يندم ع اللى فات  
واما كان يتمنى يسمع  
أى صوت  
من حبايبه  
اللى فاتوه  
للذكريات  
ما كانش يسمع غير  
أزير الطيارات  
وهى بتهد المصانع  
والبيوت  
والخوف تايوت  
لغم  
وموت

استوطنوا أرض القنال

هجرت بيتي

ومركبي

وصحيتي

وخطفت في اديا العيال

وجريت بعيد

ومش بايدي

يا بورسعيد

\*\*\*\*\*

كنا بنجری

بدون هدف

بغير وداع

هجرة وضياح

توهنا وضاع فينا الأمل

كما سفينة اتساحت

لا فيها دفة

ولا شراع

ورسينا على شط الندم

لقينا ناس من اهلنا

مستظرين

مدوا الايديين

وحوطلونا بالكرم وبالحنين

لكن

سمعنا في صدرهم  
نفس الأنين  
نفس الندم  
رحلة ألم  
أخذت عصارة عمرنا  
وكاننا  
كنا بنحرت في العدم

\* \* \* \* \*

كان بطانية في الشتاء  
حسب العدد  
حسب المدد  
وأوضه  
واحدة ف مدرسة  
ومعسكرات متكلسة  
بالمهمومين  
وتحوشتنا اتبخرت  
وسط السنين  
وسط القلق  
وعود في موسم طرحته  
ناشف  
وعارى من الورق  
الطب شخّص جرحنا  
وقال لنا

ما فيش أمل  
الجرح بالياس ارتوى  
وما لوش دوا  
وف عزم ما احنا بننطحن  
وعلمت هيئا المحن  
الله أكبر  
زلزلت  
وسمعت كل الأمم  
جيشنا هجم  
جيشنا  
عبر  
جيشنا على  
الياس  
انتصر

في ١٩٧٧

## منك بوسعيد إلى مصر الأم

أمي يا مصر  
باسم الرجال  
بابتعت إليك  
واطمئنك  
على العزيمة  
وع النضال  
وعلى الجميل  
وعلى البوغاز  
على بحيرة المنزلة  
على كل حبات الرمال  
وياطمئنك إن الرجال  
يوماتي  
بيعدوا الكنال  
لبورقواد  
الباسلة  
أمي يا مصر  
وأنا هنا  
وأنا باعيش في العمر  
أغلى الذكريات  
وصاروخنا طائر  
في السما



مغرم بصيد الطياريات  
سرحت حبه مع الزمن  
ولقيتني برجع  
للى فات  
وأنا فى أول نشأتى  
وأنا لسه  
مجموعه عشش  
للصيادين الطيبين  
ولما جه ديلسبس  
على ظهر الفرس  
وسط الحرس  
ووراه جموع الفلا حين  
المغلوبين  
على أمرهم  
أسرى  
وهما فى أرضهم  
ووالى مصر الاجنبى  
أمر لجلاده الغبى  
أبدا  
ما يرحم ضعفهم  
فاض العرق  
مال كتفهم  
والسخرة أكلت عمرهم  
على ضفتينك يا كنال

وانحنى عود الرجال

وجت مواكب السفن

بالمذعوبين

وبالمطامع

والفتن

وابن البلد دفع الثمن

ولا حضرش

الإحتفال !

وأه يا عين

ع اللى اندفن

من غير كفن

تحت الرمال

\*\*\*\*\*

واسمى أصبح

بور سعيد

للأجنبى ملكيتى

وفى ايده

كانت لقمتى

وبرغم ده

شعلة كفاحى ما انطفئت

ولا العزيمة

استسلمت

ولا اشتري وطنيتى

وانتمردت روجى  
على طول المدى  
ونزعت وجه الأجنبى  
عن وجهتى  
ووقفت أطل  
على السفن  
بإرادتى وبمصريتى  
ولما يأس الأجنبى  
من ثورتى  
من وثبتى  
صمم يعود  
وف نيته  
يهدم وجودى  
وهو ماشى فى سكته  
ووقفت أتحدى الخطر  
وأحمى الحدود  
أحمى العلم  
أحمى ابتسامة نلتها  
بعد الألم  
دالى ينول حريته  
أحسن يموت  
ولا إنه يرجع  
للمزله  
وللقبود

والكل ثار

الكل قال :

هاتوا البارود

حتى الصفار

كانوا جنود

كانوا رجال

وحاربت جيش الاحتلال

وأنا في الحصار

ورفعت راية الانتصار

رفعت

راية

الاتصار

الجمهورية في ١٩٧٤/١/٢٠

## السوس

الأملى ع السكة راح  
زى ريشة فى الرياح  
والدموع  
نازلة  
بتجربى  
من على خد الصباح  
اللى كان طالع عفى  
واللى كان  
جواه براح  
كان بيعلم بالكتير  
حلمه كان وسع الفضا  
زى طير طاير بشوق  
تحسبه بمليون جناح  
بس آه .. بس آه  
منت عذابه  
ومن قضاة  
ليه وليه مولود يغنى  
ليه وليه مشواره خير ؟  
السهام طارت  
وصابت  
طب يهوى بالجراح

والأمل  
ع السكة راح

\*\*\*\*\*

أه يا سوس ...  
لما تنخر في النفوس  
لما تاكل كل حاجة  
سلوة فينا  
لما بتغمم عينيها  
لما تنفد  
من جدار الصلب  
وتشل التروس  
آآ يا سوس  
أه يا سوس ..  
يا سفينة  
ياللى تايهه  
ليه خرجتى عن المسار  
ليه بعدتى  
عن العمار  
ليه بتتحدى الأمان ؟  
رغم أن البوصلة (١)  
ماشية مع الدومان (٢)

١ - البوصلة هي التي تحدد الاتجاه

٢ - الدومان ، هو عجلة القيادة

مين يجاوب ع السؤال

اللى مش باين له حل ، واللى طال

\*\*\*\*\*

يا سفينة ياللى تايهة

ياللى موقتى البلاد

ياللى أمنتى العباد

ليه باعوكى .. فى المزاد ؟

فيكى زاد وفيكى ماء

بس مافيكى انتماء

يا سفينة ياللى تايهة

وانتى فى البحر البعيد

وانتى فى الموج العتيد

انفضى فى البحر سوسك

اللى ريرب من غموسك

واللى مصمص فى الوريد

واستحمى بميه طاهرة

راح تشوفى المينا ظاهرة

والأمل ف يمينه زهرة

جاي يصالحك

من جديد

في ١٩٨٦

## حب على الورق

حبيبتنا هابا الكلام

حبيبتناها

بالقنا

حب يرفع شأنها مليون سنه

والليل يطول

ونقوله

هات من أوله

أصل الكلام ما أسهله

لا بينطحن

ولا يتعجن

ولا يتخلط مونه وزلط

ولا ع الكتاف بنحمئه

\*\*\*\*\*

شغلنا روحنا باليفظ

شغلنا روحنا برسمها

والشعبطة

على اسمها

وصعود على اكتاف بعضنا

وكل حبة صغيرة

تبان بعدسة

مكبره



ومهرجان  
ومنظره  
وضحكة طالعة مزورة  
عشان ماهيش  
من قلبنا

\* \* \* \* \*

يا كلمة .. يا متزوقة  
غورى بقى  
امتى بقى  
حتبطلى  
تترقصى  
وتطبلى  
وقالقة راحة سمعنا  
يا كلمة صح  
اتقدمى  
لى حروفك  
تسلمى  
وشرقى .. وغربى  
وقربى من جمعنا  
وشرفينا  
وسلمى  
عالى لصفك  
ينتمى  
للصمت .. لا تستسلمى

صوت الحدادى فى السما  
خلى البلابل تختفى  
والبوم بيضرض سطوته  
لما شموعك  
تنطفئ  
وشبعنا حب على الورق  
شبعنا من فيلم اتحرق  
من كتر ما بنكره  
واللى يحب .. بيدي ياما  
بغير تمن  
زى اللى زكى  
فى الدرا  
ما استنى حد يصوره  
أو يشكره  
واحنا بنحلم بالنعيم  
أى نعيم  
لكن بدون نقطة عرق  
وشبعنا حب على الورق

الجمهورية فى ٢١/٨/١٩٨٦

## دخان الكبابجي

حسدوني ع الدخان  
وقالولي  
يا بختك  
محظوظ  
وطول وقتك  
تتغذى بلوشي  
يا قاسى .. يا أنانى  
فى العزده لوحداك  
وناسينا بالمره  
واحننا اللي كنا زمان  
ع الحلوة  
والمره  
يا خاين العشرة  
دى صحبتك  
قشرة  
وطلعت برانى

\*\*\*\*\*

حبايبي يا فقرا  
يا أصلا  
يا أمرا  
تهتمونى يا ناس

بتهمة كبرى  
وكل دا علشان  
باشم فى الدخان  
اللى بلا استئذان  
بيمر من شيشى  
ويعبى نخاشيشى !  
ده مهرجان دخان  
وكله ع الماضى  
لا شمخه للكفتة  
ولا الزمان حتى  
فى مرة كان راضى  
وجه ودق الباب بنص رطل كباب  
يعوض الماضى  
عموما الجايات أكثر من الراحات  
بس انتوا ما تياسوش  
ومنى ما تزعلوش  
وأدى بشرة خير  
عشانكو  
مش للغير  
فى أول عيد كبير  
هاعزمكو  
ع الريحه

ففي ١٩٨٧

" مسكن الشاعر بأعلي محل الكبابجي "

## بلدنا يا مدنه

بلدنا يا مدنة  
بالحب يتلالي  
على أول السكة  
الحب والضحكة  
أتولد وويأكي  
على شطك الصافي  
وف حضنك الدافئ  
شبعنا من خيرك  
رضعنا وطنية  
ولسانا علمتيه  
يتهجي حرية

\* \* \* \* \*

وف أول النشأة  
اختلطت اللكنة  
ولبستي برنيطة  
كان الغريب سيدك  
والأمر مش بيدك

\* \* \* \* \*

نستمحك حبة  
يا أمنا الشابه

نقلب اللى انكتب  
بأحلى مية ذهب  
ياللى تاريخك لهب  
وسنبلة ونشيد  
يا سكانه فى الوريد  
يا غالية يا بورسعيد

فى ١٩٩٠

## نوة الإنفتاح

وهبت الرياح  
بنوة الإنفتاح  
قلنا  
دى نوة خير  
وجاية بالأفراح  
تطيب الجراح  
وتعوض اللي راح  
فى نوة الهجرة  
وتسعد الفقرا

\* \* \* \* \*

مبروك يا بورسعيد  
أدى حلمك البعيد  
اتحقق من جديد  
وجرحك  
لسه حى  
ويا خوفى م اللي جى  
أه يا خوفى  
م اللي جى  
ومن عين الحسود  
حافظلى على المولود

لجلن يشب العود  
وتفرع الشجرة  
ويبتسم بكرة  
هى سكة الجايين  
حاسبى يا بورسعيد  
واصحى  
يا بورسعيد

في ١٩٩٠



## قمة الانتعاش

ووصلنا قمة الانتعاش  
ملكنا أغلى الأجهزة  
لبسنا من أحلى القماش  
يا بلاش  
الدنيا ليينا زهزت  
واتزوقت  
البسكلته  
اتكهننت بره الجراش  
وبلدنا داست  
دبرياش

\*\*\*\*\*

وبيننا فى الأحلام  
قصور  
من ألف دور  
وسور محوط ع الجنينه وع السرور  
وفجأة طارت فى الهوا ما لحقناهاش  
علشانها كانت أيلكاش  
صحينا من نومنا  
لقينا الصرح باش  
والخوف رجع فى قلوبنا عاش  
ودخلنا غرفه لانتعاش

فى ١٩٩٠

## قدرنا يا بلدنا

وقدرنا يا بلدنا  
إن احنا بنحبك  
ع الحلوة والمره  
برضه احنا  
بنحبك  
أصل اللي داق خيرك  
واتدفا بسيرك  
وشب على شطك  
لو شطت الدنيا  
ما يشط عن طوعك  
أو يرضى بخضوعك  
أو تنطفى شموعك  
وما لوش مكان بينا  
اللي خرج عنا  
اللي نهب خيرك  
ولاف على غيرك  
طلع على اكتافك  
وعيام الغالى  
وقال ...  
وانا مالى  
تعبى  
ورسمالى

ليا ولعياالى  
وما دمت فى العالى  
أحكم  
واتحكم  
أصادر البسمة  
واحود النسمة  
ع اللى بيعحلالى  
لكن  
ولا يهمك  
أحنا محبينك  
وأحنا اللى من طينك  
وأحنا اللى من دمك  
وهمنا همك  
بس انتى شاوريلنا  
ونظمى سيرنا  
تلاقينا فى الشدة  
حراس على بابك  
تلاقينا فى المرحه  
بنعلق الزينه  
على كل تراسينه  
وينعزم احبابك  
ومهما راح تكبر  
عليكى  
ما ح تكبر

ولا ننسى عنوانك  
دا نيشنا لسه  
منقوش على حيطانك  
من واحنا لسه  
صغار  
بننام  
على كتافك  
وشنطة المدرسة  
مخزن لأصدافك

\*\*\*\*\*

يا نجمة بتلالى  
معانا  
فى الغربة  
ومعانا طوالى  
يا إيد بتعضن إيد  
فى أجمل المواعيد  
يا عقد فل  
وعيد  
ياغالية  
يا بورسعيد

فى ١٩٩٠

## بيروت

سقف المدينة  
اتهدم  
فوق كل كانن حي  
والرعب  
لما حكم  
حاش الهوى  
والضى  
بيروت بحالها  
تابوت  
بلعت بشر  
وبيوت  
واللى نجام الموت  
مش لاقى نقطة مى د

فى ١٩٨٢

# أحفادك يا فلسطين

## إهداء الى أطفال الحجارة

البذرة في وسط النار

شبت

طرحت ثوار

والعود الأخضر

صار

يتصدى للإعصار

\*\*\*\*\*

وسلاحه

إيمانه بأرضه

الأرض حياته

وعرضه

ع الفاصب فتح عينه

قام يحمي تاريخه ودينه

قام يهتف بالحريّة

أعزل

وجذوره قوية

يتحدى جيش جرار

\*\*\*\*\*

أحفادك يا فلسطين

طالعين

من نفس الطين  
ملاصهم من ملامحنا  
راضعين من مراحمنا  
فى خيام الضفة  
وغزوه  
بدماهم رفعوا العزة  
وراياتك  
أعلى جدار

\* \* \* \* \*

يا ضمير العالم  
كله  
فى جيبك وصمة عار  
فى حمايتك  
نصروا القتلة  
فى حمايتك  
سرقوا الدار  
والمجنى عليه  
بقى جاني  
وقضية بدون أنصار  
بقى لا جىء جوه حدوده  
محو اسمه  
ونكروا وجوده  
السونكى

ف صدر وليده  
والدم على الأسوار

\*\*\*\*\*

وان ضاع الحق  
ما يرجع  
إلا بإدين أصحابه  
أصل اللي اديه  
فى المبه  
غير اللي اديه فى النار

\*\*\*\*\*

والعود الأخضر .. صار  
يتصدى للإعصار  
وسفينة النصر ح ترسى  
مهما يكون التيار  
مهما تكون الأخطار  
مهما يطول المشوار  
مهما  
يطول  
المشوار

الجمهورية فى ٢٢/٦/١٩٨٨



## الشبار

حتى الشبار  
صممنا لازم نعدمه  
خدنا القرار  
وماقش قرار  
حشينا جدره من القرار  
حلاوتنا لما نتفق  
نفنى العمار  
حلاوتنا لما نيتسم  
والنية ترسم للدمار  
بارت بحيرة المنزلة  
صارت عليلة  
ومزيلة كل الديار  
وكان ده هو الهدف  
هو الأمل  
هو الشعار  
اللى بقوة بنرفعه  
وبافتخار  
على شواهد الانتحار

\*\*\*\*\*

كان .. ياما كان  
كانت بحيرة المنزلة

زمان .. زمان  
ميصضة  
ومرسى للأمان  
السمكة تلقى فى حضنها  
كل الحنان  
تبخ بطروخها  
وتخرج م البوغاز  
تعود وترجع للبحار  
بدون حواجز  
أو حصار  
والخير كثير  
منحة إلهى للغنى ويا الفقير  
لا كان مزارع  
ولا ابتكار  
مات الشبار  
مات اللى كان فى الجوبية (١)  
له منظر جميل  
وفسه أجمل من دنيس البردويل  
ولوز وفستق  
لى راضى بالقليل  
واتحوجنا للدخيل  
للهريل  
١- الجوبية : قفص من السلك يدخل السمك لياكل  
الطعم ولا يستطيع الخروج منه .

الى ما يكلوش بخيل  
للمتلج  
والمنط  
واللى شوكة  
مالوش مثيل  
ماعادش فيه قدامنا غير  
مصاحبة البحر الكبير  
بس مين فينا  
أمير  
مين الى يقدر ع الوقار  
مين الى يقدر ع القاروص  
دا احنا غلبة بالقوى  
ومشكلتنا المزمه  
هى القلوس  
وازاى نجيب  
حق الغموس

فى ١٩٩١

## مركب هه ورق

ياللى الغرور مركبك  
والبحر لك  
خدام  
والموجة بتمر جحك  
والجو لك بسام  
ضحك عليك الموج  
ومشيت مع التيار  
ومركبك  
من ورق  
فى بحر ماله قرار  
اصحى  
يا صاحبي  
وفوق  
للشط عود تانى  
وبلاش يا صاحبي تكون  
على روحك الجانى  
وبلاش تبص لفوق  
بعظمة واستكبار  
انا وانت .. ح نكون ايه  
واللا بنعمل ايه  
واللا وصلنا لايه

مهما نكون شطار  
أنظر كده فى السما  
تلقى الفلك  
سيار  
وأرضنا فى الفضاء  
بتلف ليل  
ونهار  
وكل .. كل البشر  
ما يوقضوش اعصار  
وأنا وانت ايه هاتكون  
من كل هذا الكون  
واللا وصلنا لايه  
مهما نكون شطار  
دا العلم له وحده  
والحكم له وحده  
واحد  
مالوش تانى  
حليم قوى جبار  
سبحانه  
سبحانه

فى ١٩٨٠

## عليه علي الخالي

كان لي صاحب  
زمان  
أمنته علي مالي  
وحفظت سري معاه  
وجعلته رسالي  
وكان دراغي اليمين  
كان عمي  
كان خالي

\*\*\*\*\*

وريته .. كيف ازاي  
يبنى .. وعليته  
وهي روضة الخلان  
بالحب حبيته  
وابني الوحيد  
يا ناس  
علي اسمه سميته

\*\*\*\*\*

اللي افكرته وفي  
وشهم آل  
وأمين  
كشف ضميره الخفي

واتارى له وشين  
بوش  
كان يبتسم  
ووش  
كان سكين  
حبلى الامان قطعته  
وحدفتى  
م العالى  
واتارى لما بنيت  
عليه  
على الخالى  
راح الضمير  
ولاجاش .. ولا فيش علام ببلاش  
واما دفعت التمن  
كان التمن  
غالى

في ١٩٨٢

## الفرانك صورة غنائية

ادم وحواء اتنين  
أول بشاير .. همه  
وسلسلة موصله  
لحد آخر أمة  
والنيل حفر مجراه  
وأصله نقطه مطر  
عشقنا وعشقناه  
ولا تعب، م السفر  
وحبه من سنبله  
شربت حنان الطين  
طرحت سنابل ذهب حلفت بها الملايين  
ولقمة من غير دين  
تسوى خزائن مال  
ولقمة من غير تعب  
تاكل  
كنوز أمة  
شبال الدقيق  
حمل على كتفى يا واد حمل  
عمرنا بنشيل  
وبنتحمل  
حمل على كتفى يا واد حمل



الكل وله صنعه  
فى ايده  
ملك منظمة صاحبة سيده  
يا خد من ده  
ودا بيزيده  
ويقرمل ده  
ودا بيكمل  
حمل على كتفى  
يا واد .. حمل  
نخل الدقيق  
هزى يا بت المنخل  
هزى  
هزى وهزى وهزى وهزى  
يا لى المنخل فرحان بيكى  
صقف وبيرقص  
ف ايديكى  
حلوة يا بت  
اسم الله عليكى  
وانت مع النعمة  
بتتهزى  
العجان  
سمى وشمر ..  
اعجن .. خمر

تلقى رغيضك  
حلو مقمر  
أرض .. أرض  
بطط .. بطط  
الله يعينك  
الله ينور  
المعلم للمناول ؛  
خش يا واد بالطاولة عليه  
ماشى بتدلع كده ليه  
خلي عزيمتك  
تبقى موتور  
ناس على باب الفرن طابور  
الفران للمعلم ؛  
حيلك حيلك هديت حيلي  
دانا عل الحال ده سنين  
وشهور  
قوم يا معلم  
خدلك دور  
علشان عرقك يبقى بحور  
الطابور للفران ؛  
حاسب .. حاسب  
رايح فين  
خليك عاقل  
خليك زين

طول باللك .. يصلح حالك

دا احنا بقالنا ساعات

واقفين

الضران للطابور

هو انا يعنى بستين ايد

ولا انا قطر بسكة حديد ؟.

دا احنا يا عالم

دم وروح

ما بنرتخش كمان

فى العيد

الطابور للمعلم ،

حوش يا معلم .. حوش يا معلم

مالك ساكت كده ومبلم ؟

المعلم للطابور ،

يعنى اعملى جناية معاه ؟

ها اسكت احسن مش ها آتكلم

الطابور

رحنا بلاش

رحنا بلاش

وقتنا غالى وراح ببلاش

بعد ما دوخنا فى الطوابير

هانروح

ولا نتعاشاش

رحنا بلاش .. رحنا بلاش

الفران للطابور :

إسبت عندك .. إنت وهو

جيت برضاي مش بالقوه

الطابور :

شر وراح .. شر وراح

خليه جوه النار مرتاح

المعلم للفران :

يعنى يا واد مانتاش زعلان ؟

الفران للمعلم : ربنا ما يجيب بيتا زعل

المعلم للفران :

رغم إنك عصبي وغليان

بس يا واد

شربات وعسل

الطابور :

شر وراح .. شر وراح

خليه جوه النار مرتاح

( زفه للعروسين بالسائرات )

الكلاكسات :

بيب .. بيب

المدعوين :

يا عريس

زبون فى الطابور :

طوابير دوشه

وشارع ورشة

ما تخلصنا عشان نتمشى

حاجة تخلى العقل

يطيش

المعلم للزبون

هانت .. هانت

رؤق .. رؤق

دا انت هاتاكل أجمل عيش

وها تتمشى على الكورنيش

ولا هاشعلل بينا شيطان

ولا هايخلص بينا

شاويش

زيون :

هات ثلاثين

زيون آخر

هات خمسين

المعلم

مش هادى اكثر من عشرين

بس طابور .. كله طابور

حتى ان كان صاحبى ومتعشم

الطابور :

تسلم لعيالك يا معلم

حقاني وما تعيب الزور  
إلهي ما يهبطلك عيش  
ولا ينشلكش مجور  
ولا يقطعش عليك الميه  
ولا يقطعش عليك  
النور

في ١٩٨٢

## أصيلة يا سمسمية

أصيلة يا سمسمية  
يا أم التلات خشبات  
يا أم الطبق بالذات  
يا شائلة حزن الوطن  
فى الشدة  
ومفرقة  
يوم الفرح شربات

\*\*\*\*\*

أصيلة ومأصلة  
يا أم الخمس أوتار  
وكانهم ثوار  
وكانهم أنصار  
كنا فصيلة لهاب  
كنا شرارة غضب  
فى قلب خط النار  
وجودنا كان اصرار  
نغمنا كان إعصار  
زلزل جيوش العدو  
فوق شطنا  
المسروق  
وسينا من تحتهم

تغلى  
كما البركان  
ويتنتظرننا بشوق  
وعبرتى  
يا مسممة  
ورائتنا طائلة السما  
عبرتى بالايهان  
وينصره الأوطان  
وبأجمل الألحان  
يوم ستة من أكتوبر  
وعشرة  
من رمضان



## الغيوم المفزعة

خبيبة  
وراكبة على فرس  
ولابسة توب الفتونة  
وماسكة بوق  
الجعجعة  
وهي في ركب الأمم  
صارت في حجم الضفدعة  
يا دى الغيوم المفزعة  
يا دى الخطر  
لسه التتار  
على أرضهم  
وانذاروا  
هلكوا بعضهم  
حب الزعامه فدمهم  
لو حتى كانوا  
كام نفر  
يا ذنب .. لا  
لن يقتصر

\*\*\*\*\*

ياكل .. كل الشهدا  
فى عمر الوطن

يا صفحة بيضة  
منورة كتاب الزمن  
يا لى لولا انتوا ..  
ما كنا  
ولا كانش اترفع لينا علم  
بين الأمم  
زيحوا تابوتكم  
واطلعوا  
وكل عضمة  
تكون غضب  
تكون شهب  
حمم لهب  
وترجموشم كلهم .. كلهم  
لجل التاريخ يكتب  
فى لوحة قبرهم  
هنا الضلال  
الى حكم  
واللى هدم  
ثم النهزم

\*\*\*\*\*

يا خسارة الدم  
الى يملا الف بحر  
وراح هدر

يا خسارة المد  
الى عدا  
وخذ بايد الإنسانية  
من الحضر  
الدنيا عبرت للعلا  
واحنا بإيدينا بننتحر  
والقدس  
بعد الأندلس  
قالت لنا فين العبر  
إيه لسه تانى يا عرب  
إيه لسه فى عب القدر  
ومين يلم اللى انفرط ؟  
ومين يرم اللى انكسر  
دا كل نبت بيتولد  
بايده يحضر  
مدفنه  
وكل مجد فاتوة جدودنا  
فى كل لحظة  
بيندثر  
وراح هدر  
راح هدر

فى ١٩٨٧

## وكنّت صاحبي ومصباحي

الى روح شاعر بورسعيد الكبير  
حلمى الساعى

يا عم حلمى يا أستاذنا  
يا ساعى  
للكلمة الحرة  
فى الندوة كنت تحضرنا  
وكنّت رائد للشعرا  
جيتلك وأنا  
لسه باخطى  
والكلمة يتشب معايا  
جيتلك وأنا  
هايب منك  
وبارتعش من جوايا  
حنيت بإيدك  
على كتفى  
وقولتلى ،  
اسمع يا ابنى  
عشان تهندس فى بيوتك  
تكون كمان تعرف تبنى  
فتحت مجراك ليا  
وكنّت صاحبي ومصباحي  
وبكل حب

تقدمنى  
لحد ما فردت جناحى  
عرفت ايه يعنى القافية  
عرفت فى الشعر بحوره  
فعلن فعولن مفاعيلن  
قطعت من كل زهوره  
الأنفة  
كانت تجمعنا  
والنقد كان يبني ما يهدم  
وكنت بتباصى لغيرك  
عشان يخطى  
ويتقدم  
والندوة بعد ما تنهيهها  
والقصر  
يقف أبوابه  
فى السكة نمشى نكملها  
والليل يعدى  
ماندرا به  
ياللى القوافى  
خضعتلك  
والوزن  
يرجع لميزانك  
فى صف بيرم والصفوة  
حضرت اسمك

ومكانك  
وكل معنى جميل  
قلته  
عاش في نبض محبينك  
مين بس يطلع  
باللولى  
مين اللى يطبع دواوينك ؟

في ١٩٨٩

## النيل استحمى

بعد أن فاض النيل في مفيض توشكى سنة ١٩٩٦ أمر وزير الري  
ولأول مرة منذ بناء السد العالي بفتح نهايات النيل على بحر  
المالح حتى يفتسل من التراكمات .

النيل يتوب الشقا  
خذ غطس في المالح  
المالح انعكر  
زعل وشوقه اتحبس  
ولا خدوش يا لحضن  
زى زمان .. زمان  
أيا ماكان للقا  
تشريفة ومهرجان  
وقاله إيه يا نيل  
بقى بعد طول غربتك  
وربحك العنبر  
راجع في وش الهوا  
تشوف لحالك دوا  
وتاجك اتبعتر  
وانا وعشيرتى هنا  
قاعدين بنستنى  
لحظة عبور موكبك  
ببشاير الجنة

الكل يتبارك  
والموج يقول وسع  
وأنت سعيد بالعيد  
وتصب من غير تمن  
الشهد متكرر  
نبيل ريقنا بيبك  
نطيب ونتطهر  
وخلونا يظهر  
ويتكمل الفرحة  
لما الشباك تنطرح  
وتتقل الطرحة  
وف عودة السرحة  
صبية مستنظرة  
بالحنة والطرحة

\* \* \* \* \*

يا حباقي الحد  
ع البعد بنشمة  
وبروحنا بنضمة  
يا حضن موسى أما  
فارق لحضن أمه  
والى وهب زادك  
بحبنا زادك  
وقالك أجرى أجرى



إلى ما شاء الله  
وكون سبيل للناس  
وحتى حسادك  
يا جاي بصحبة ورد  
واتوضى ببيك السد  
مين جرحك في الرحلة  
مين غرقك في الوحلة  
وهان عليه الضل  
وعظيم قوم ذل  
في وسط خلانه  
لكنه زى الأم  
مهما يشيل من هم  
يفوت ويسقى الكل  
ويدارى أحزانه

١٩٩٦

## مشمش نقش ریشه

مشمش نقش ریشه  
فرحان بورتیشه  
لو ساحت البویه  
ح ینکشف خیشه  
مشمش علی البسطه  
طلعها بالواسطه  
فی الغش کان أسطی  
ده مذهبہ وعیشہ  
مشمش قفل بابہ  
فی وش احبابہ  
عفرنا بترابہ  
و شتمنا من شیشہ  
مشمش ہنیالہ  
رایقہ وضحکالہ  
بیطوح الفكہ  
ویا کتر بقشیشہ  
مشمش شهر سیفہ  
ولا حد علی کیفہ  
لو شک فی خیالہ  
یقوم بتفتیشہ  
خلیہ علی عیبہ

في بحر ملاءيبه  
التوه ح تجيبه  
كما ولدته أمه  
لا ريشه من ريشه  
ولا قتله من خيشه  
ولا حتى في الشمس

في ١٤٠٢

## شجرة التوحيد

باسمك وباسم الخير  
والحب والجمال  
يا مالك الملكوت  
يا باقى يامتعالي  
الهمنى أقول حكمتك  
واقطف من الرسمال  
اللى ف ظلاله حييت  
وبركته مالىه البيت  
ومخضره الأيام  
وكان خير الكلام  
وونيسى والدليل  
قرآنك اللى نزل  
ورتلّه جبريل  
على لسان النبى  
عربى فصيح وجميل  
طيب قلوب البشر  
لما الضعيف انتصر  
بالعدل وبالقصاص  
لا فرق بين الناس  
فى الجنس أو فى اللون  
ولا بكنوز الذهب

أو الحسب والنسب  
المرء وما كسب  
والعفو في المقدره  
والحكم بالتنزيل

كان الضحى الوضاح  
في عز عز الليل  
كان المطر والسييل  
من بعد شح طويل  
طرح فرح وأمان  
في روضة الرحمن  
المخلوقات سبحت  
والإنس ويا الجان  
وشجرة التوحيد  
في كل ركن بعيد  
طرحت وخيرها ما زال  
طارح في كل زمان  
وعلى مدار الكون  
في كل لحظة أدان  
والعلم أيا كان  
له أصل في القرآن  
ومعجزاته كتير  
وكل يوم علماته

يكشفها بالتفسير  
حروفه نور على ينور  
عبيره أحلى عبير  
ومرحمه ويلسم

: \* \* \* \* \*

يا رب يا أعظم  
وبجرحنا أعلم  
ببركة الحرمين  
وببركة الفاتحة  
خلى القلوب سبعة  
موصوله ومسامحة  
والمسلمين قوة  
منصورة بكتابك  
وافتح لنا بابك  
فى يوم لا سلطان  
إلا لسلطانك  
إلا لغضارتك  
صلوا على أحمد  
ووجدوا الأوحى  
سبحانه  
سبحانه

فى ١٩٩٢

## جيتلك يا رب البيت

جيتلك يا رب البيت  
طلبتنى لبيت  
نادى المنادى عليه  
من عز نومي صحيت  
سترت جسدى الفانى  
بسترة من غير خيط  
وجريت جريت جريت  
سبقت ما استنيت  
تميت طواف الكعبة  
شبع من بير زمزم  
شربت واتوضيت  
هرولت بين الصفا  
والمروة لم كليت  
قويتنى لما سعيت  
وف زحمة الدعوات  
الصاعده من عرفات  
وقفتك وناديت  
يا رب واترجيت  
وفرمية الجمرات  
ساعدتنى وعديت  
ومن كرم نعمتك

وهبتلك وهديت  
حللت واتمتعت  
عبدت واتهنيت  
ونلت ما التمنت  
صليت بكيت دعيت  
يا رب اكون وفيت  
شكرا لرب البيت  
شكرا لرب البيت

في ١٩٩٤



## واتقابلنا عند الحبيب

فى المدينة  
فى رحاب حضرة نبينا  
الشوق جمع بين القلوب  
والشعوب والصحاب  
بالحنين واللفتة عدينا الصعاب  
دبنا فى الحشد المهيّب  
الى بيادى التحية للحبيب  
الى حيانا بعبيره  
والى نورنا بنوره  
وارتفع بينا المقام  
جنب صاحب المقام  
فزنا فى الروضة الشريفة بركعتين  
الدموع سالت وبلت  
مهبط الوحي الأمين  
الأمل هلال وكبر  
والخريف من تانى خضر  
ارتوى بعد المشيب  
والتأم جرحى وطاب من غير طبيب  
عند الحبيب  
يا محمد  
يا رسول الإنسانية  
يا معلم يا إمام

الحبايب حملوني  
التحية والسلام  
كل واحد له وصية  
كل واحد له أمانى  
شئ ما يتقلش فى كلام  
حملهم خبيته فيه  
والأمانة اللى بيه  
تحت شباكك أهى  
كل من فيها باسمه  
وسطهم حطيت أمالى  
زى كل العثمانيين  
يا شفيح المسلمين  
نفسى أحظى بالقبول  
وأبقى فى ركب الرسول  
عند رب العالمين  
حتى لو كنت الأخير  
برضه خير  
المهم أوصل لبابه  
وأبقى ضمن الموعودين

فى ١٩٩٤

## وطارت العصافير

بالأمس كان الهمس  
نقم ونسمايه  
وحس يشبعنا  
بحرف له معنى  
وشجرة العصافير  
عند المعديّة  
ساعة المغربيّة  
تعزف سيمفونية  
واللحن ريانى  
وف عز عز الخوف  
وقلوعنا مطوية  
صوتها مونسه  
ومزينه المطرح  
وف الألوان تطرح  
وتطاطى بفروعها  
وتقول لنا دوقوا  
والشكر مش ليا  
اتوحدوا هي واحد  
ووحدوا النيه

\*\*\*\*\*

وعيت لقيتها شابه

وشبت وهي هي  
عفيه وحاضنه طيرها  
وصوتها في وداني  
يا خدني والقاني  
الخطوة شداني  
وطويل يا مشوارها  
وانسى التعب لما  
ارتاح على سورها  
ويا ما ياما ارتحت  
في ضلها وسبحت

\*\*\*\*\*

وفي آخر مرة روجت  
لقيت الدنيا هس  
وحس غير الحس  
قاللى الزيارة انتهت  
كده وخلص وبس  
ووسع لو سمحت  
وسع لو سمحت  
حزنت لأنى روجت  
حزنت لأنى شفت  
المشهد الأخير  
وزى حاجات كتير  
وبامر من الكبير

شالوها من جذورها  
وطارت العصافير

في ١٩٩٦

## سوق الفالصو

وجينا نقول كلام زاهى وله معنى  
ما حدش فاضى يسمعنا  
فنعمل ايه  
فى سوق الفالصو بدعنا  
مشى سوقنا  
سبقنا الكل وطلعنا  
لاخر دور وجمعنا  
خيوط المعمة فى ايدنا  
وسيدنا  
فى طرف الخيط مهاودنا  
ورهن اشارة بصبا عنا  
وكلمة هس بنقولها  
ولو بشويش  
فى آخر الدنيا يسمعنا  
عبرنا قنطرة بكرة  
وضى الشهرة لعنا  
لكين بنصدي من جوه  
وصار التبت مش هوه  
ويا حسرة على الخضرة  
على الذكرى  
على شموعنا  
وقعنا بكيفنا وبطوعنا  
ولا دمة على امبارح

ولا رجعه لينبوعنا  
ح نعمل ايه  
ما دقنا الطعم وشبعنا  
ووسع البحر ما يسعنا  
وقرش البر دلوقتى  
ما عايش يا صاحبى بنفعنا  
ولا المعنى  
بقاله فى عرفنا معنى

فى ١٩٩٥

## الديب والدب والحية

الديب وقف ع التبه وحده  
ولا حد قدده  
هو الوصى  
هو الكبير  
هو المطاع  
مصلح زمانه ومخلبه تحت القناع  
ضاع اللي ضاع  
ولا حد صده

\*\*\*\*\*

والدب لابيض  
ايه اللي هده  
كدة مرة واحدة  
من غير ما حد يروح لحدده  
اتفك عقدة واقصرط فوق الطريق  
وصار لا شيء  
والديب كريم  
عمال يطوح له الفتات  
وهو يمدغ من سكات  
وكانه مات  
كأنه راضى بركنته بره الزمان  
مع انه كان وكان وكان  
ودبته ترج الميدان



خسر الرهان  
والهوجه عصفت بالبيان  
والديب لوحده الديدبان

\*\*\*\*\*

والحية أم الألف ديل  
للديب دليل  
بتحوم وتنفخ سمها في وش الحياة

\*\*\*\*\*

الديب وصل لمنتهاه  
رسم وخطط ملعبه على هواه  
هو الحكم  
والهاند مان  
ومراقب المباراة لغاه  
الكورة كورته وملعبه  
وطخذ في اللي يععبوا  
وقيل ما يستتر كسب  
ونتيجه المباراه معاه  
واحسرتاه... واحسرتاه  
يعنى خلاص  
(صوت) لأمش خلاص  
بالكل حيكون الخلاص  
بالكل حيكون الخلاص

في ١٩٩٧

## وكانى أب لكل الولاد

وكانى أب لكل الولاد  
فى كل البلاد  
م المهد لما للمشيب  
واحلم واطيب  
فى الحلم لما احلبهم كوب الحليب  
واخاف واطبطب وارتعش  
وأضمهم  
وأشيل همومهم كلهم يوم الامتحان  
واقول يا رب افتح لهم طاقة أمل  
مش يا اختيارهم يخرجوا فى هذا الزمان  
والديديان يهشهم  
لآخر حدود المزرعه  
شفت السحابة فى عز يوليه مدمعة  
معرفش ليه  
يمكن مخصمانه السما  
واللا عشان شايضة الوشوش متجهمة  
ومسهمة  
حصالتى ماليانه دعا  
تخويشة العمر العفى  
هى اللى حيلتى فى دنيتى  
وريشة وشوية ورق  
لزوم خيالى ومرسمى للذكريات  
من حين لحين

اخرج جميع الامنيات  
واخذ من الحلم الجميل اللي انسرق  
كل الولاد  
كل البنات  
وافضل اجوزهم لبعض واغفهم  
واشيل ولادهم ع الورق  
واحكي حكايات  
وبالتبات  
وبالتبنات  
ومن سكات  
أعود ألملم مرسمى  
وأطوى الورق  
وأشد روى من الفرق

\* \* \* \* \*

كام ألف يوم م العمرقات  
والله أعلم باللى أت  
ولسه بحلم وابتسم  
وأزكى بشوية دعا

١٩٩٤

## إمتى يا موج تغنى

الموج ما بقاش يغنى  
وان شافتنا من بعيد  
يودى وشه بعيد  
يطير الشماسى  
ويعكر الأيام  
واحنا اللى عز النوه  
ما فرقنا القوة  
قربنا أكثر وأكثر  
وكبرنا بالأحلام  
نملا الشبك من خير  
يفرح لنا ولطيره  
ما كانش بينا حساب  
ولا كانش لينا هوى  
إلا هواك يا بحر  
واللمه والأحباب  
وبلهفة العشاق  
الموج يسابق بعضه  
عشان يقدم بوسه  
لشطنا المشتاق  
ولاتخلص الأشواق  
والنورس اللى معدى  
فى عنيه جمال إمبراح  
لشط بحر المالح

أبو قلب ساع الكل  
كانت قلوبهم لسه  
طالعة من البيضة  
أبيض بيحضن أبيض  
ياسمين يبوس الفل  
وكل يوم بيهل  
يزرع شتايل حب  
لا شجرة طرحت غل  
ولا دمعة بله السكة  
من حرقة الموال  
ولا كانش فيه عزال  
إمتى يا موج ح تغنى  
إمتى يروق البال  
الموج فضفض وقال  
مفیش جواب يا بر  
عندك رد السؤال

في ١٩٩٩

## عضم الشهيد

أمانة يا صاحبي  
وأنت هناك  
وف صحبة ناسك  
يتقلب رملة سينا الغالية بفاسك  
حاسب حاسب يا ابن الناس  
من سن القاس  
جائز وأنت في عز حماسك  
فاسك يلمس عضم شهيد  
وأكيد هتلاقى كلامي صحيح  
بوصيك، وأوصيك  
عضم المجهول  
كفنه من تاني وصلى عليه  
وابنيله ضريح  
وازرع لبلايه وضلاية  
وسبيل من نهر النيل  
وانقش برخام الشاهد  
ويخط جميل  
هنا واحد م الأوفات  
عدا أنا وفات  
وسبقنا لفوق  
استشهد لا جل نعيش

لكن دمه ما راحش بلاش  
ولا راحش بعيد  
دمه بيجرى فى كل وريد  
خلا جبينى يطول النجمة  
خلا فتارى يهش العتمة  
خلا الطير الحاير يرجع عشه ونبت فيه  
الريش  
وفتحنا الشيش  
وأمانه أمانه  
إن هل العيد  
قبل الفسحة والتفاريح والمراجيح  
خد أطفالك بالأزهار  
واستقبل كل الزوار  
كون الأهل  
كون الصحية  
كون له وليد  
كون السقا للفسقية  
تفرح تطرح ريحة زكية  
نسمة طرية تهل عليه  
والطير ييجى يسبح ربه من حواليه  
وأما تشاهد نبت جديد  
اقرا الفاتحة لكل شهيد  
لولا هو ما كانت مصر

تقول أنا مصر  
ولا حسينا بيوم العيد

الجمهورية يناير ١٩٩٦



## سؤال للوطن

مين يا وطن يستاهلك  
عابر سبيل والا  
عاشق بطول الزمن  
لا جلك بيسستاهلك  
ولا قال على مهالك  
مين اللى وقت النداء  
أول طابور السفر  
على حدود الخطر  
يهلك ولا تهلك  
مين اللى من أهلك  
ومين بيتجاهلك  
يمكن عشان جاهل  
بأمورك القامئة  
ولانى محتاجلك  
وصوتى راح منى  
من كتر ما ندهلك  
الظن سوحنى  
ولقيتنى فى الآخر  
بالعنة متحاصر  
خايف يكون القندم  
نازل على الفاضى

والقاضي مش قاضي  
يبقى عليه العوض  
في الماضي والحاضر  
يبقى عليه العوض  
في .. بكرة  
وف بعده

في ١٩٩٦

## وليامز وعسران

اهداء الى الفدائي سيد عسران

من ابطال معركة ١٩٥٦

وليامز كان مستعفى

مغرور باسطوله

وبعرضه وبطوله

عائش في أوهامه

نياشينه على صدره

وطبنجة في حزامه

وفاكران البلد

ح تطاطى قدامه

\* \* \* \* \*

الجرح كان جرحين

والعسران عشرين

واليسر كان متخفى

وعيونته لم ناموا

من بين حطام البيت

والحبسة من خمسة

طلع ولد عفریت

حكم بإعدامه

جاله الولد سيد

بقنبله فى رغيّف  
وقاله دوق موتك  
أما احنا ح نعيد  
وشعبنا السيد  
لآخر الزمان  
كان الولد عسران  
اليسر يعد العسر  
ونشيد لبورسعيد

وليامز ، قائد المخابرات البريطانية فى العدوان الثلاثى سنة ١٩٥٦

## يا عم يا بلاسى

اهداء الى روح شاعر بورسعيد الكبير حامد بلاسى

يا عمى ويا خالى

من تحت شباكك

من قتلة بشباكك

غزلت على قدى

سطين على نولى

وشعرك اللولى

عملته تاج راسى

يا عم يا بلاسى

مريت على بحرك

سمعت كل الطير

بيغنى من شعرك

ودخلت بستانك

لقيت كل الزهور

صحبة من الشعرا

ولقيتك الخولى

ولقيتك القاضى

توزنها بالشعره

رقم الصفحة	الاسم	م
٥	الشرع القديم	١
٦	سلام سلاح	٢
٩	الفارس المغمور	٣
١٣	الخشف	٤
١٨	تهمة ولا كل التهم	٥
٢١	قرعنة	٦
٢٥	مشرط الجراح	٧
٢٨	رحلة ألم	٨
٣٢	من يورسعيد إلى مصر الأم	٩
٣٧	السوس	١٠
٤٠	حب علي الورق	١١
٤٣	دخان الكبابجي	١٢
٤٥	بلدنا يا مدنا	١٣
٤٧	نوة الانفتاح	١٤
٤٩	قمة الانتعاش	١٥
٥٠	قدرنا يا بلدنا	١٦
٥٣	بيروت	١٧
٥٤	أحصادك يا فلسطين	١٨
٥٧	الشبر	١٩
٦٠	مركب بن ورق	٢٠
٦٢	عليك علي الخالي	٢١
٦٤	الفرانين	٢٢
٧١	أصيلة يا سمسمية	٢٣
٧٣	القيوم المفزعة	٢٤
٧٦	وكنيت صبحي ومصباحي	٢٥
٧٩	النيل استحمي	٢٦
٨٢	مشمش نفش ريشة	٢٧
٨٤	شجرة التوحيد	٢٨
٨٧	جيتلك يا رب البيت	٢٩
٨٩	واقايلنا عند الحبيب	٣٠
٩١	وطارت العصافير	٣١
٩٤	سوف الفالصو	٣٢
٩٦	الديب والذب والحية	٣٣
٩٨	وكانني اب لكل الولاد	٣٤
١٠٠	إمتي يا موج تغني	٣٥
١٠٢	عضم الشهيد	٣٦
١٠٥	سؤال للوطن	٣٧
١٠٧	وليامز وعسران	٣٨
١٠٩	يا عم يا بلاسي	٣٩